

Hunto cu otro expertonan reconoci internacionalmente

TICO CROES INCLUI DEN BUKI DI UNIVERSIDAD DI ANTILLAS

Arubiano reconoci atrobe como experto riba tereno constitucional

ORANJESTAD (AAN): Na fin di aña pasa, Universidad di Antiyas Hulandes a dicidi di publica un buki científico den cual a inclui obranan di diferente expertonan internacional ariba tereno constitucional. Tico Croes, Miembro di Parlamento pa AVP y persona cu a aporta na e rapport di AVP cu a conduci na disponibilidad di Hulanda pa schrap fecha di independencia di Aruba, tambe a worde inclui.

E representante di Nacionnan Uni den Caribe, Dr. Nour-Eddine ta ariba e lista

hunto cu Dr. Frank Abdullah Sub Secretario General di Caricom, e experto constitucional di Antiyas Boeli van Leeuwen y Sir Shridath Ramphal Presidente di e West Indian Commission, Tico Croes di Aruba y otronan.


E buki a aparece den cuadro di e discusionnan cu tabata anda na Antiyas en cuanto futuro estatal y Universidad di Antiyas a invita expertonan ariba e tereno aki pa bay duna nan punto di vista.

Reconocimento a worde duna na Tico Croes, experto ariba tereno constitucional kende hunto cu Mito Croes y

Henny Eman a traha ariba e rapport "Doño di Nos Propio Destino" cu cual na 1989 AVP a confronta Hulanda y a habri caminda pa Hulanda acepta pa schrap e fecha di Independencia di Aruba.

Den e buki, Tico Croes ta aborda e temanan di Referendum y Democracia como un experto ariba e tereno di derecho internacional. E ta profundiza den e contenido di democracia y e papel cu un referendum ta hunga den e proceso democratico.

Tico Croes a analiza e tema den e realidad na diferente pais pa muestra con den cada situacion un referendum



por tin otro motibo y consecuencia. El a muestra con un referendum por worde usa dor di regimennan dictatoriales pa asina legitimiza un golpe di estado. Tico Croes a demostra su conocimiento amplio di e materia constitucional dor di analiza pakico Hulanda no ta usa referendum, mientras Suiza si ta conoci pa e cantidad di referendum cu e pais Europeo aki ta tene.

Mientras un referendum por worde abusa pa alcanza un obhetivo contrario na democracia, na paisnan manera Suiza un referendum a sirbi como parti di e cultura politico. Na otro ocasionnan e ta un forma pa pulsa pensamiento di Pueblo y tuma decision encunto asuntonan delicado.

Mayoria di bez ora Gobiernonan dicidi pa referendum nan ta pensa cu e referendum lo sali na favor di nan pensamiento. Di otro banda referendum no semper ta duna un prueba pa e pensamiento di Pueblo pa e limitacion di preguntanan, manera a socede na Aruba cu naturalmente ta haya atencion di parti di Tico Croes.

Un articulo impresionante a bira e aporte científico di Tico Croes na e buki di Universidad di Antiyas, cu na hopi ocasion ta haci uso di e conocimiento di Tico Croes ariba tereno constitucional.